

四庫全書

集部

欽定四庫全書

集部

唐詩紀事卷十六

八至

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

膳錄貢生臣鄧友樞

欽定四庫全書

唐詩紀事卷十六

宋 計敏夫 撰

王維

王縉

裴迪

崔興宗

王維

集異記載維未冠文章得名妙能琵琶春之一日岐王引至公主第使為伶人進注前一進新曲號鬱輪袍并出所為文主大奇之令宮婢傳教遂召試官至第諭之作解頭登第

祿山之亂李龜年奔於江潭曾於湘中採訪使筵上唱
云紅豆生南國秋來發幾枝贈君多採擷此物最相思
又清風明月苦相思蕩子從戎十載餘征人去日慙慙
囑歸鴈來時數附書此皆維所製而梨園唱焉

維年十七時九日憶山東弟兄云獨在異鄉為異客每
逢佳節倍思親遙知兄弟登高處遍插茱萸少一人

祿山大會凝碧池梨園弟子歔歔泣下樂工雷海清擲
樂器西向大慟賊支解於試馬殿維時拘於菩提寺有

詩曰萬戶傷心生野煙百僚何日更朝天秋槐落葉深
宮裏凝碧池頭奏管絃後有罪以此詩獲免

寧王憲貴盛寵妓數十人有賣餅之妻纖白明媚王一
見屬意因厚遺其夫求之寵愛逾等歲餘因問曰汝復
憶餅師否使見之其妻注視雙淚垂頰若不勝情時王
座客十餘人皆當時文士無不悽異王命賦詩維先成
云莫以今時寵難忘異日恩看花滿眼淚不共楚王言
座客無敢繼者王乃歸餅師以終其志出本事詩

或說維詠終南山詩譏時也詩曰太一近天都連山接
海隅言勢焰盤據朝野也白雲回望合青靄入看無言
徒有其表也分野中峰變晴陰衆壑殊言恩澤偏也欲
投人處宿隔水問樵夫畏禍深也

維善畫破墨山水嘗自制曰當代謬詞客前身應畫師
不能捨餘習偶被時人知

維字摩詰為給事中遇祿山反賊平下遷太子中允三
遷尚書右丞喪妻不娶孤居三十年母亡表輞川第為

寺終葬其西寶應中代宗語王縉曰朕嘗於諸王座聞
維樂章今傳幾何遣中人往取縉裒集數百篇上之表
曰臣兄文辭立身行之餘力當官堅正秉操孤直縱居
要劇不忘清淨實見時輩許以高流至於晚年彌加進
道端坐虛室念茲無生乘興為文未嘗廢業詔荅云卿
之伯氏天下文宗位歷先朝名高希代抗行周雅長揖
楚詞調六氣於終篇正五音於逸韻泉飛藻思雲散襟
情詩家者流時論歸美誦於人口久鬱文房詩以國風

宜登樂府眎朝之後乙夜將觀石室所藏歿而不朽栢
梁之會今也則亡乃眷棣華克成編錄聲猷益茂歎息
良深

商璠云維詩辭秀調雅意新理愜在泉為珠著壁成繪
一字一句皆出常境至如落日山水好漾舟信歸風又
澗芳襲人衣山月映石壁又天寒遠山靜日暮長河急
又賤日豈殊衆貴來方悟稀又日暮沙漠陞戰聲煙塵
裡詎肯慙於古人也

送晁監歸日本國云積水不可極安知滄海東九州何
處所萬里若乘空向國唯看日歸帆但信風鰲身映天
黑魚眼射波紅鄉樹扶桑外主人孤島中別離方異域
音信若為通

送邛為云憐君不得意況復柳條春為客黃金盡還家
白髮新五湖三畝宅萬里一歸人知爾不能薦羞稱獻
納臣

獵騎云風勁角弓鳴將軍獵渭城草枯鷹眼疾雪盡馬

蹄輕忽過新豐市還歸細柳營回看射雕處千里暮雲

平

自送晁監以後三詩姚合極元集云此詩家射鵬之手也更擇其極元者

藍田精舍云落日山水好漾舟信歸風翫奇不覺遠因
以尋源窮遙愛雲木翠初疑路不同安知清流轉偶與
前山通捨舟理輕策果然愜所適老僧四五人逍遙映
松栢朝梵林方曙夜禪山更寂道心友牧童世事問樵
客暝宿長林下焚香卧瑶席澗芳襲人衣山月映石壁
再尋畏迷誤明發更登歷笑謝桃源人花紅復來覲

西施篇云艷色天下重西施寧久微朝仍越溪女暮作
吳宮妃賤日豈殊衆貴來方悟稀要人傳脂粉不自着
羅衣君寵益嬌態君憐無是非當時浣沙伴莫得同車
歸寄言鄰家子効顰安可希

淇上別趙仙舟云相逢方一笑相送還成泣祖席忽傷
離荒城復愁入天寒遠山靜日暮長河急解纜君已遙
望君猶佇立

李陵詠

時年十九

云漢家李將軍三代將門子結髮有奇策

少年成壯士長驅塞上兒深入單于壘旌旗列相向簫
鼓悲何已日暮沙漠陞戰聲煙塵裏將令驕虜滅豈獨
名王侍既失大軍援遂嬰穹廬耻少小蒙漢恩何堪坐
思此深哀欲有報投軀未能死引領望子卿非君誰相
理

渭城朝雨裊輕塵客舍青青柳色新勸君更盡一杯酒
西出陽關無故人維送客詩也

王綰

縉字夏卿河中人與兄維俱以名聞舉草澤文辭清麗
科上第相肅宗

縉九月九日作云莫將邊地比京都八月嚴霜草已枯
今日登高樽酒裏不知能有菊花無

別輞川云山月曉仍在林風涼不絕殷勤如有情惆悵
令人別

贈曇壁上人云林中空寂舍階下終南山高卧一床地
回看六合間浮雲幾處滅飛鳥何時還問義天人接無

心世界閑誰知大隱客兄弟自追攀

遊悟真寺云聞道黃金地仍成白玉田
擲山移巨石呪嶺出飛泉猛虎同三
逕愁猿學四禪買香燃綠桂乞火
踏青蓮草色搖霞上松聲泛月邊
山河窮百二世界滿三千梵宇聊
憑覽王城遂眇然灞陵纔出樹渭
水欲連天遠縣分朱郭孤村起白
煙望雲思聖主披霧憶羣賢薄宦
慙尸祿終身擬尚玄誰言草庵客
曾和栢梁篇送孫秀才云帝城風日
好况復建平家玉枕雙紋簾金

盤五色瓜山中無魯酒松下飯胡麻
莫厭田家苦歸期遠復賒

裴迪

過曇興上人山院云不遠灞陵邊
安居向十年入門穿竹徑留客聽
山泉鳥囀深林裏心閑落照前
浮名竟何憶從此願棲禪

迪初與王維興宗俱居終南天寶後為蜀州刺史與杜

甫友善

興宗姓崔

與王維訪逸人不遇賦詩云恨不逢君出荷蓑青松
白屋更無他陶令五男曾不有蔣生三選任相過芙蓉
曲沼春流滿薜荔成帷晚靄多聞說桃源好迷客不如
高卧盼庭柯

維詩云桃源一向絕風塵柳市南頭訪隱淪到門不敢
題凡鳥看竹何須問主人城外青山如屋裏東家流水
入西鄰閉戶著書多歲月種松皆作老龍鱗

王維輞川集云余別業在輞川山谷其遊止有孟城坳

華子岡文杏館
竹嶺鹿柴

去聲

木蘭柴
茱萸泝

潘上去音匹半

切水
流也

宮槐陌
臨湖亭南垞

音奈

歌湖柳
浪藥家瀨金屑泉

白石灘
北垞竹里館
辛夷塢
漆園等與裴迪閑暇各賦絕句云

維孟城坳云
新家孟城口
古木餘衰柳
來者復為誰
空悲昔人有

迪和云
結廬古城下
時登古城上
古城非疇昔
今人自來往

維華子岡云飛鳥去不窮連山復秋色上下華子岡惆
悵情何極

迪和云落日松風起還家草露晞雲光侵履跡山翠拂
人衣

維文杏館云文杏裁為梁香茅結為宇不知棟裏雲去
作人間雨

迪和云迢迢文杏館躋攀日已屢南嶺與北湖前看復
迴顧

維斤竹嶺云檀藥映空曲青翠漾漣漪暗入商山路樵
人不可知

明流紆且直綠篠密復深一逕通山路行歌望舊岑

和迪

鹿柴云空山不見人但聞人語響返景入深林復照青

苔上

維

日夕見寒山便為獨往客不知深林事但有齧麕迹

和迪

木蘭柴云秋山斂餘照飛鳥逐前侶彩峰時分明夕嵐

無處所

維

蒼蒼落日時，鳥聲亂溪水。
綠溪路轉深，幽興何時已。

和廸

茱萸泝云結，實紅且綠復。
如花更開山，中儻留客置此。

芙蓉盃

維

飄香亂椒桂，布葉間檀藥。
雲日雖廻照，森沉猶自寒。

和廸

宮槐陌云返，逕蔭宮槐幽。
陰多綠苔應，門但迎掃畏有。

山僧來

維

門前宮槐陌，是向欽湖道。
秋來山雨多，落葉無人掃。

和廸

臨湖亭云輕舸迎上客，悠悠湖上來。
當軒對樽酒，四面

芙蓉開

維

當軒彌滉漾孤月正徘徊谷口猿聲發風傳入戶來

和迪

南垞云輕舟南垞去北垞淼難即隔浦望人家遙遙不

相識

維

孤舟信一泊南垞湖水岫落日下崦嵫清波殊淼漫

和迪

歌湖云吹簫凌極浦日暮送夫君湖上一迴首青山卷

白雲

維

空濶湖水廣青熒天色同艤舟一長嘯四面來清風

和迪

柳浪云分行接綺樹倒影入清漪不學御溝上春風傷

別離

維

映池同一色逐吹散如絲結陰旣得地何謝陶家詩

和廸

藥家瀨云颯颯秋雨中淺淺石溜瀉跳波自相濺白鷺

驚復下

維

瀨聲喧極浦沿涉向南津汎汎鷗鳬渡時時欲近人

和廸

金屑泉云日飲金屑泉少當千餘歲翠鳳翊文螭羽節

朝玉帝

維

縈渟澹不流金碧如可拾迎晨含素華獨往事朝汲

和廸

白石灘云清淺白石灘綠蒲尚堪把家住水東西浣沙

明月下

維

跂石復臨水弄波情未極日下川上寒浮雲澹無色

和廸

北垞云北垞湖水北雜樹映朱欄逶迤南川水明滅青

林端

維

南山北垞下結宇臨歌湖每欲採樵去扁舟出菰蒲

和廸

竹里館云獨坐幽篁裏彈琴復長嘯深林人不知明月

來相照

維

來過竹里館日與道相親出入唯山鳥幽深無世人

和廸

辛夷塢云木末芙蓉花山中發紅萼澗戶寂無人紛紛

開且落

綠堤春草合王孫自留翫況有辛夷花色與芙蓉亂

和廸

漆園云古人非傲吏自闕經世務偶寄一微官婆婆數

株樹

維

好閑早成性果此諧宿諾今日漆園遊還同莊叟樂

和廸

椒園云桂樽迎帝子杜若贈佳人椒漿奠瑤席欲下雲

中君

維

丹刺刺人衣芳香留過客幸堪調鼎用願君垂採摘

和迪

李傾聖善閣送迪入京云雪華歛高閣苔色上鈎欄藥
草空階靜梧桐返照寒清吟可愈疾携手暫同歡墜葉
和金磬饑鳥鳴露盤伊川惜東別灞水向西看舊託舍
香暑雲霄何足難

崔興宗

興宗為右補闕時和王維勅賜櫻桃詩云未央朝謁正
遠迤天上櫻桃錫此時朱實初傳九華殿繁花舊雜萬
年枝全勝晏子江南橘莫比潘家大谷梨聞道令人顏
色好神農本草自應知

喜羣公訪林亭云窮巷深林常閉關悠然獨卧對前山
今朝忽枉嵇生駕倒屣開門遙解顏

王維詩云綠樹重陰蓋四鄰青苔日厚自無塵科頭箕
踞長松下白眼看他世上人

盧象云映竹時聞轉轆轤當窓只是網蜘蛛主人非病
常高臥環堵蒙籠一老儒

王縉云聲名不問十年餘老大誰能更讀書林中獨酌
隣家酒門外時聞長者車

裴廸云喬柯門裏自成陰散髮窓中曾不簪逍遙且喜
從吾事榮寵從來非我心

時號興宗
為處士

又王維有崔九往南山馬上口號與別云城隅一分首
幾日還相見山中有桂花莫待花如霰

裴迪云歸山深淺去須盡
邛壑美莫學武陵人暫遊桃
源裏

興宗留別云駐馬欲分襟
清寒御溝上前山氣景佳
獨往還惆悵

王維與興宗寫真詠云畫君年少時
如今君已老今時新識人知君
舊時好

王維送興宗遊蜀云送君從此去
轉覺故人稀徒御猶回首田園方
掩扉出門當旅食中路授寒衣
江漢風流

地遊人何歲歸



唐詩紀事卷十六

欽定四庫全書

唐詩紀事卷十七

宋 計敏夫 撰

賀知章

賀蘭進明

李邕

陰行先

李伯魚

趙冬曦

尹恣

崔成甫

李昂

殷遙

徐延壽

苑咸

邛為

賀知章

詠柳云碧玉粧成一樹高萬條垂下綠絲條不知細葉

金野月公集 卷十七
誰裁出二月春風似剪刀

曉發詩云故鄉杳無際江臯聞曙鐘始見沙上鳥猶埋
雲外峰

知章年八十六卧病冥然無知疾損上表乞為道士還

鄉明皇許之捨宅為觀賜名千秋命其男曾予會稽郡

司馬賜鑑湖剡川一曲

元乞官湖數頃為放生池因賜剡川一曲

詔令供帳

東門百寮祖餞御製送詩并序云天寶三年太子賓客
賀知章鑒止足之分抗歸老之疏解組辭榮志期入道

朕以其年在遲暮用循挂冠之事俾遂赤松之遊正月
五日將歸會稽遂餞東路乃命六卿庶尹大夫供帳青
門寵行邁也豈惟崇德尚齒抑亦勵俗勸人無令二疎
獨光漢冊乃賦詩贈行詩云遺榮期入道辭老競抽簪
豈不惜賢達其如高尚心寰中得秘要方外散幽襟獨
有青門餞群英悵別深又云筵開百壺餞詔許二疎歸
仙記題金錄朝章寵賜衣悄然承睿藻行路滿光輝
李林甫詩云挂冠知止足豈獨漢疎賢入道求真侶辭

榮訪列仙睿文舍日月宸翰動雲煙鶴駕吳鄉遠遙遙
南斗邊

知章採蓮詩云稽山雲霧鬱嵯峨鏡水無風也自波莫
言春度芳菲盡別有中流採芰荷

朝士以知章吳越人戲云南金復生中土知章賦詩云
釵鏤銀盤盛蛤蜊鏡湖蓴菜亂如絲鄉曲近來佳此味
遮渠不道是吳兒

神龍中知章與越州賀朝方齊融揚州張若虛邢巨湖

州包融俱以吳越文詞俊秀名聞上京朝方山陰尉齊
融崑山令若虛兗州兵曹巨監察御史融遇張九齡引
為懷州司戶集賢直學士知章最貴神龍中又有尉氏
李澄之善五言詩終宋州參軍

知章送張說巡朔方應制云荒境盡懷忠梯航已自通
九攻雖不戰五月尚持戎遣戍徵周牒臨邊重漢攻選
車命元宰授律取文雄曹出天弧上謀成帝幄中詔旂
分夏物專討錫唐弓帳宿伊川右鉦吹晉苑東饗人藉

贊實樂正理絲桐岐陌涵餘雨離川照曉虹恭聞詠方
叔千載舞皇風

又送張說集賢上學士應制云西學垂元覽東堂發聖
謨天光燭武殿時宰集鴻都枯朽霑皇澤飄飛舞帝梧
跡同遊汗漫榮是拔泥塗三歎承湯鼎千歡接舜壺微
軀不可荅空欲詠依蒲

賀蘭進明

古意云秦庭初指鹿羣盜滿山東忤意皆誅死所言誰

肯忠武關猶未啓兵入望夷宮為崇非涇水人君道自窮

又云崇蘭生澗底香氣滿幽林采采欲為贈何人是同心日暮徒盈把徘徊憂思深慨然紉雜佩重奏邛中琴祿山亂進明守臨淮以御史大夫為節度使張巡睢陽之圍遣南霽雲乞師不應霽雲去抽矢回射佛寺浮圖曰吾破賊必滅賀蘭此矢所以志也

行路難云君不見巖下井百尺不及泉君不見山上苗

數寸凌雲煙人生相命亦如此何苦太息自憂煎但願
親友長含笑相逢莫乏杖頭錢寒夜邀歡須秉燭豈得
容思花柳年

君不見門前柳榮耀暫時蕭索久君不見陌上花狂風
吹去落誰家鄰家思婦見之歎蓬首不梳心歷亂盛年
夫婿長離別歲暮相逢色凋換

君不見芳樹枝春花落盡蜂不窺君不見梁上泥秋風
始高燕不栖蕩子從軍事征戰蛾眉嬋娟守空閨獨宿

自然堪下淚，況復更聞烏夜啼。

君不見雲間月，暫盈還復缺。君不見林下風，聲遠意難窮。親故平生或聚散，懽娛未盡樽中空。歎息青青陵上柏，歲寒能有幾人同。

君不見東流水，水去無窮已。君不見西郊雲，日夕空氣氤。羣鴈徘徊不能去，一鴈驚鳴復失羣。人生結交在終

始，莫以升沉中路分。

右行路難商璠
取於河岳英靈

進明登開元十六年進士第。肅宗時進明為北海太守。

詣行在上命房琯以進明為南海太守兼御史大夫嶺南節度使琯以為攝御史大夫進明入謝遂譖之上由是疎琯

李邕

李之芳自尚書郎出為齊州司馬製新亭邕有登歷下古城負外孫新亭詩云吾宗固神秀體物寫謀長形制開古跡曾冰延樂方太山雄地理巨壑眇雲莊高興泊煩促永懷清典常含宏知四大出入見三光負郭喜粳

稻安時詩吉祥

之芳大弟子蔣王揮之後善五言詩初為祿山范陽司馬祿山叛自拔歸

子美八哀詩有秘書監江夏李邕詩云長嘯宇宙間高

才日陵替古人不可見前輩復誰繼憶昔李公存詞林

有根柢

唐文苑傳李邕廣陵江都人父善嘗注文選六十卷行於時邕少知名長安初李嶠張廷珪並

薦邕詞高行直堪為諫諍

聲華當健筆灑落富清製風流散金石追

琢山岳銳

邕早擅才名尤長碑頌中朝衣冠天下寺觀多出其手

情窮造化理學

貫天人際干謁走其門碑版照四裔各滿深望還森然

起凡例蕭蕭白楊路洞徹寶珠惠龍宮塔廟湧浩劫浮

雲衛宗儒俎豆事故吏去思計眇眇已皆虛跋涉曾不

泥向來映當時豈獨勸後世豐屋珊瑚鉤騏驎織成罽

紫駟隨劔几義取無虛歲分宅脫驂間感激懷未濟衆

歸賙給美擺落多藏穢

邕素負美名頗被貶斥皆以邕能文養士而賈生信陵之流執

事忌勝剝

獨步四十年風聽九臯唳

邕知名長安中死天寶初十四年間

落在外
可謂獨步矣累獻詞賦甚稱明皇旨後因上計中使臨索其新文以文章徹天聽故有九臯唳之句

嗚呼

江夏姿竟掩宣尼袂往者武后朝引用多寵嬖否臧太

常議

邕有駁韋巨源謚議文士推重之

面折二張勢

初邕為左拾遺俄而御史中丞宋璟

奏侍臣張昌宗兄弟有不順之言請付法斷則天初不應邕在陛下進曰璟言事關社稷望陛下可其奏則天色解始允宋璟既出或謂邕曰子名位尚卑若不稱旨禍福將不測向為造次如是邕曰不顧不狂其名不韋

衰俗凜生風排蕩秋旻霽忠正負冤恨宮闕深疏綴放

逐早睥翮低垂困炎厲

邕始以與張柬之善貶雷州明皇初又貶比後召還為姚崇所

嫉貶台州徵為陳州明皇東封回邕謁見於汴獻詞賦稱旨頗自矜銜為張說所惡發陳州賍事抵死許州人孔璋上疏救之會赦免貶欽州後於嶺南從中官楊思勗討賊有功轉括溜滑三州刺史上計京師邕少有名累被貶逐後進不識京洛阡陌聚觀以為古人或傳眉目有異衣冠望風尋訪門巷又中使臨問索其新文復為人陰中竟日斜鵬鳥入翬斷蒼梧帝榮枯走不暇星不得進用也

駕無安稅幾分漢庭竹

漢制以竹使符分給郡守
邕累為刺史故曰幾分

夙擁

文侯篲終悲洛陽獄事近小臣敬禍階初負謗易力何

深瘠

邕與柳勣馬一疋及勣下獄吉
溫令勣引邕議及休咎事遂誅

伊昔臨淄亭酒酣

託末契

甫有陪李北海宴
歷下亭詩是也

重叙東都別朝陰改軒砌論

文到崔蘇

崔信明蘇源明二
人以文章擅也

指盡流水逝近伏盈川雄

唐文苑傳楊炯為盈川令卒張沈曰楊盈川文思如
懸河注酌之不竭既優於盧照隣亦不減王勃也未

甘特進麗

張說曰李嶠之文如良金美玉無
疵不可特進李嶠為特進故也

是非張相

國相扼一危脆

明皇東封回邕於汴州謁見累獻詞賦
甚稱上旨由是頗自矜銜自云當居相

位又素輕張說與相惡
說為中書令甚惡之

爭名豈古然鍵捷歟不閉例及

吾家詩曠懷掃氛翳慷慨嗣真作咨嗟玉山桂鍾律儼

高懸鯤鯨噴迢遞坡陀青州血燕沒汶陽瘞

邕薨所也

哀贈

竟蕭條恩波延揭厲

代宗時國恩
例贈秘書監

子孫存如綫舊客舟

凝滯君臣尚論兵將帥接燕薊朗詠六公篇

邕有張桓
等五王洎

狄相六
公詩

憂來豁蒙蔽

盧藏用嘗謂邕如干將莫耶難與
爭鋒但虞傷缺耳後卒如其言

邕字太和揚州人既冠見李嶠願一見秘書乃假直秘

閣累以罪譴開元末歷淄滑二州刺史上計京師阡陌

聚觀出為北郡太守李林甫忌之天寶末以柳勣事遣御史就郡杖殺之先是邕王弼王琬皆耆艾補外久書疏尺題有譴謫留落之句林甫故陰議除之

陰行先

張燕公說至湘有九日登高詩云西楚茱萸節南淮戲馬臺寧知洹水上復有菊花盃亭帳憑高出親遊自遠來短歌將急景同使性情催

行先和云重陽初啓節無射正飛灰寂寞風蟬至連翩

雙鴈來山棠紅葉下
岼菊紫花開今日桓公坐多愧
孟嘉才

行先開元間為湘州從事

李伯魚

伯魚桐竹詩云北住青桐北南家綠竹南竹林君早愛
桐樹我初貪鳳棲桐不媿鳳食竹何慙棲食更如此餘
非鳳所堪

張燕公說和云結廬桐竹下室邇人相深接垣分竹逕

隔戶共桐陰落花朝滿岬明月夜披林竹有龍鳴管桐
留鳳舞陰

伯魚臨淄人登開元六年進士第善為文擢校書郎出
為青州司功而卒其妻范陽張氏女燕公之妹也燕公
銘張氏墓云送我伯妹萬安之墳精靈何處為雨為雲
彼臨淄兮千里望倏忽兮夫君

趙冬曦

和張燕公說早霽南樓詩云方曙躋南樓凭軒肆遐矚

物華喧淑氣春景媚晴旭川霽湘山孤林芳楚郊縹列
巘重疊翠遠岫逶迤綠風帆摩天垠漁艇散灣曲鴻歸
鶴舞猿猿叫鶯斷續羣動皆熙熙噫予獨羈束常欽才
子義忌鵬傷蹠跼雅尚騷人文懷沙何迫促未知二賢
意去矣從所欲

和張說耗磨日飲云春來半月度俗忌一朝閑不酌他
鄉酒無堪對楚山

冬曦定州人開元初為監察御史坐事流岳州召還復

官

酬燕公歸田賦之作云窮鳥嬰籠綴孤飛任播遷鷦鷯
王佐用復此挫冲天楚雲何掩鬱湘水亦迴遭懷哉愧
木鴈忽爾枉蘭荃愈疾同枚叔銷憂比仲宣歸途書可
畏弱藻石猶堅覆載雖云廣溱陽直塊然

澠湖作云三湖返入兩山間畜作澠湖彎復彎暑雨奔
流湘正滿微霜及潦水初還水還波卷溪潭涸綠草芊
芊岼嶸岸適方飛棹共迴旋已復揚鞭恣行樂道傍者

老步蹢躅楚言茲事不知年試就湖邊披草徑莫疑東
海變桑田君訝今時盡陵陸我看明歲更淪漣來今自
昔無終始人事廻環常若是應思闕下聲華日誰謂江
潭旅遊子初貞正喜固當然往蹇來譽宜可俟盈虛用
捨輪輿旋勿學靈均遠問天

序云巴江南澧湖者蓋沅
湘汨之餘波淪匯洞庭澹

澹千里夏潦成湖冬涸為野尔雅云
水返入為澨斯名之作有由焉爾

和燕公岳州山城云為吏恩猶舊投沙惠比蒙江邊悠
爾處泗上宛然同訪道精言合論經大義通鳴琴有真

氣況已沐清風

陪燕公行郡竹籬云良臣乃國寶麾守去承明外戶人
無閑浮江獸已行隨來晉盜逸民化蜀風清郭郭從彝
典州閭荷德聲小人被天涯流落巴邛城所賴中和作
優游鑿與耕

酬燕公出湖見寄云綸紱有成命旌麾不可攀湘川朝
日斷荆闕夕波還果枉東瞻唱興言夕放閑携琴仙洞
中置酒澗湖上芳景恣行樂謫居忽如忘聚散本相因

離情自悲悵鷺翮非常戢鵬天會昭曠永懷宛洛游曾
是彈冠望

和燕公遊澠湖上寺云江外多山水招要步馬來琴將
天籟合酒共鳥聲催巖坐攀紅藥溪行愛綠苔所懷非
此地遊望亦徘徊

和燕公別澠湖云南湖美泉石君子玩幽奇灣澳陪臨
泛巖岵共踐窺秋風頽桂疎春景綠楊垂郢路委分竹
湘濱擁去麾枉帆懷勝賞留景惜差池水木且不棄情

由良可知

尹忭

陪燕公登南樓詩云君子每垂眷江山共流盼水遠林
外明巖近霧中見終日西北望何處是京縣屢登高春
臺徒使淚如霰

燕公和云危樓瀉洞湖積水照城隅命駕邀漁父通家引
鳳鷁山晴紅藥匝洲曉綠苗鋪舉目思鄉縣春光定不殊
趙冬曦云寬慰何以歡陰氣亦登望孤島輕霧裏行舟

白波上目勞西北雲心醉東南障昔日青溪子胡然此
無狀

秋夜遊澠湖詩云熊軾巴陵地鷁舟湘水潯江山與勢
遠泉石自幽深杳靄入天壑冥茫見道心超然無俗事
清宴有深林

又云江上饒奇山噴羅雲水間風秋樹色雜苔古石文
斑巴浴將千澦澠湖凡幾灣嬉遊竟不盡乘月泛舟還
悉序云燕公以董司馬初到趙侍御客焉聿理方舟嬉
遊澠壑覽山川之異採泉石之奇盼望崇朝留樽待月

一時之樂
豈不盛與

燕公和云澨湖佳可遊既近復能幽林裏棲精舍山間
轉去舟鴈飛江月冷猿嘯野風秋不是迷鄉路尋奇處
處留

又云坐嘯人事閑佳遊野情發山門送落照湖口望昇
月林尋猿狖居水戲黿鼉六朔風吹飛鴈芳草亦云歇
趙冬曦云政理常多暇方舟此汴汭吹笙虛洞荅攀楫
便風催山暗雲猶辯潭幽月稍來清溪無數曲未盡莫

先回

又云煙靄夕微蒙幽灣賞未窮
艤舟待初月寒幌招遠風
鶴聲聒前浦人火明暗叢
東山雲壑意不謂爾來同
張均云遠水沉西日寒沙聚
夜鷗平湖乘月滿飛棹接
星流黃葉鳴淒吹蒼葭掃
暗洲願移滄浦賞歸侍潁川
遊

又云灣潭幽意深杳靄涌寒岑
石痕秋水落嵐聚夕陽
沉澄澈天為底淵玄月作心
青溪非大隱歸棄白雲尋

汎洞庭云風光浙浙草中飄日采熒熒水上搖幸奏瀟
湘雲壑意山傍欲與動仙橈

燕公和云平湖一望水連天秋景千潯下洞泉忽驚水
上光華滿疑是乘舟到日邊

悉開元時張燕公岳州從事也官補闕

崔成甫

李白詩崔
侍御是也

贈李白云我是瀟湘放逐臣君辭明主漢江濱天外常
求李白老金陵捉得酒仙人

白和云嚴陵不從萬乘遊歸卧空山釣北流自是客星
辭帝座元非太白醉揚州

李白澤畔吟序云澤畔吟者逐臣崔公所作云代業文
宗早茂才秀起家校書蓬山再尉關輔中佐于憲車因
貶湘陰流離沅湘摧賴草莽忠憤義烈形于清辭其怨
者之流乎

開元末長安令韋堅兼水陸轉運使鑿潭望春樓下先
時民間唱俚歌曰得體紇那邪其後得寶符於桃林時

成甫為陝縣尉更得體歌為得寶洪農野堅命舟人歌
之成甫又廣之為歌辭十闕自衣缺後綠衣錦半臂紅
抹額立第一船為號頭以唱集兩縣婦女百人鮮服靚
粧鳴鼓吹笛以和之

先是人間歛唱歌詞云得

丁統

體

都董反

統那耶統囊得

體耶潭裏船車開楊州銅器多三郎當殿坐看唱得體
歌至開元二十九年田同秀上言見玄元皇帝云有寶
符在陝州桃林縣古關令尹喜宅發中使求而得之以

為殊祥改桃林為靈寶縣以韋堅為陝郡太守鑿新潭
潭成又致楊林銅器翻出此詞廣集兩縣官使婦人唱
之言得寶弘農耶弘農得寶耶潭裡船車鬧揚州銅器
多三郎當殿坐看唱得寶歌成甫又作歌詞十首

李昂

雋秀等科初皆考功主之開元二十四年李昂員外性
剛急不容物以舉人皆飭名求稱搖蕩主司談毀失實
竊病之而將革焉集貢士與之約曰文之美惡悉知之

矣考校取舍存乎至公如有請託於時求聲於人者當
首落之既而昂外舅嘗與進士李權隣居相善乃舉權
於昂昂怒集貢人召權庭數之權謝曰人或相知竊聞
於左右非敢求也昂因曰觀衆君子之文信美矣然古
人云瑜不掩瑕忠也其有詞或不典將與衆評之若何
皆曰唯公之命既出權謂衆曰向之言其意屬吾也吾
誠不第決矣又何籍焉乃陰求昂瑕以待之異日會論
果斥權章句之疵以辱之權拱而前曰夫禮尚往來來

而不往非禮也鄙文不臧既得而聞矣而執事昔有雅
什嘗聞於道路愚將切磋可乎昂怒而嬉笑曰有何不
可權曰耳臨清渭洗心向白雲閑豈執事之詞乎昂曰
然權曰昔唐堯衰耄厭倦天下將禪於許由由惡聞故
洗耳今於天子春秋鼎盛不揖讓於足下而洗耳何哉
是時國家寧謐百寮畏法令兢兢莫敢跌昂聞惶駭蹶
起不知所酬乃訴於執政謂權風狂不遜遂下權吏初
昂強復不受囑請及有吏議求者莫不允從由是庭議

以省郎位輕不足以臨多士乃以禮部侍郎專之

昂賦戚夫人楚舞歌云定陶城中是妾家妾年二八顏如花閨中歌舞未終曲天下死人如亂麻漢王此地因征戰未出簾櫳人已薦風花菡萏落轅門雲雨徘徊入行殿日夕悠悠非舊鄉飄飄處處逐君王閨門向裏通歸夢銀燭迎來在戰場相從顧恩不顧己何異浮萍寄深水逐戰曾迷隻輪下隨君幾陷重圍裏此時平楚復平齊咸陽宮闕到關西珠簾夕殿聞鐘鼓白日秋天憶

鼓鼙君王縱恣翻成誤
呂后由來有深妬
不奈君王容鬢衰
相存相顧能幾時
黃泉白骨不可報
雀釵翠羽從此辭
君楚歌兮妾楚舞
脉脉相看兩心苦
曲未終兮袂更揚
君流涕兮妾斷腸
已見諸君歸
惠帝徒留愛子付周昌

殷遙

題友人亭云故人雖薄宦
往往涉清溪
鑿牖對山月
褰裳拂澗霓
遊魚逆水上
宿鳥向風棲
一見桃花發
能令

秦漢迷

山行云寂歷青山曉山行趣不稀
野花成子落江燕引雛飛
暗草薰苔徑晴楊掃石磯
俗人猶語此余亦轉忘歸

王維哭之云人生能幾何
畢竟歸無形念君等為死
萬事傷人情慈母未及葬
一女纔十齡泔泔寒郊外
蕭條聞哭聲浮雲為蒼忙
飛鳥不能鳴行人同寂寞
白日自悽清憶昔君在時
問我學無生勸君苦不早
令君無所

成故人各有贈又不及半生負爾非一途慟哭返柴荆
又曰送君反葬石樓山松柏蒼蒼賓馭還埋骨白雲長
已矣空餘流水向人間

遙丹陽入天寶間終於忠王府曹參軍

徐延壽

人日剪綵詩云閨婦持刀坐自憐裁剪新葉催情綴色
花寄手成春帖燕留粧戶黏雞欲向人驚來問夫婿何
處不如真

延壽開元間江寧人處士也

苑咸

王維贈咸詩序曰苑舍人能書梵字兼達梵音曲盡其妙戲為之贈詩曰名儒待制滿公車才子為郎典石渠蓮花法藏心懸悟貝葉經文手自書梵詞共許勝揚馬梵字何人辯魯魚故舊相望在三事願君莫厭承明廬咸荅詩曰蓮花梵字本從天華省仙郎早悟禪三點成伊猶有想一觀如幻自忘筌為文已變當時體入用還

推問氣賢應同羅漢無名欲故作馮唐老歲年

王為庫部員外

郎久不遷故咸末句及之王荅云仙郎真意憐同舍丞相無私斷掃門

咸成都人開元末上書拜司經校書中書舍人顏真卿序遜逃文集曰公之除庶子也苑咸草詔曰西掖掌綸朝推無對議者以為知言唐人推咸為文誥之最後貶漢東郡司戶參軍復起為舍人終永陽太守始咸舉進士在京仲夏忽染疾而卒三日復蘇云見人追至陰司見劉敬則為冥官乃同舉進士也問其故乃曰追城乃

誤召公速遣押還咸曰數上京不捷家遠且貧試閱籍
若有科第官職即願生還劉謂曰君來春登第歷臺省
至中書舍人

邛為

為蘇州嘉興人事繼母孝嘗有靈芝生堂下累官太子
右庶子時年八十餘而母無恙給俸祿之半及居憂觀
察使韓滉以致仕官給祿所以惠養老臣不可在喪為
異唯罷春秋羊酒初還鄉縣令謁之為候門磬折令坐

乃拜里胥立庭下既出乃敢坐經縣宇降馬而趨卒年
九十六與劉長卿善長卿送為赴上都詩云帝鄉何處
是岐路空垂泣楚思愁暮多川程帶潮急潮歸人不歸
獨向回塘立王摩詰送為往唐州詩云四愁連漢水百
口寄隨人

為尋西山隱者不遇詩云絕頂一茅茨直上三十里扣
關無僮僕窺室唯案几若非巾柴車應是釣秋水差池
不相見暈勉空仰止草色新雨中松聲晚秋裏及茲繼

幽絕自足盪心耳雖無賓主意頗得清淨理興盡方下山何必待之子

王維送為落第東歸詩云憐君不得意況復柳條春為客黃金盡還家白髮新五湖三畝宅萬里一歸人知爾不能薦羞為獻納臣

摩詰賦左掖梨花詩云閑灑階邊草輕隨箔外風黃鸝弄不足啣入未央宮

為和云冷艷全欺雪餘香乍入衣春風且莫定吹向玉

階飛

皇甫冉詩云巧解迎人笑偏能亂蝶飛春風時入戶幾
片落朝衣

唐詩紀事卷十七

欽定四庫全書

唐詩紀事卷十八

宋 計敏夫 撰

杜甫 李白

杜甫

元稹作子美墓銘敘曰余讀詩至杜子美而知古人之
才有所揔萃焉始堯舜之君臣以賡歌相和是後詩人
繼作歷夏殷周千餘年仲尼緝拾選練取其干預教化
之尤者三百篇其後無聞焉騷人作而怨憤之態繁然

猶去風雅日近尚相比擬秦漢已還采詩之官既廢天下俗謠民謳歌頌諷賦曲度嬉戲之詞亦隨時間作至武帝賦栢梁詩而七言之體具蘇子卿李少卿之徒尤工為五言雖句讀文律各異雅鄭之音而詞意闊遠指事言情自非有為而為則文不妄作建安之後天下之士遭罹兵戰曹氏父子鞍馬間為文往往橫槊賦詩故其道文壯節抑揚怨哀悲離之作尤極於古晉世風槩稍存宋齊之間教失根本士以簡慢矯飭相尚文章以風

容色澤放曠清淨為高蓋吟寫性靈流連光景之文也
意義格力無取焉陵遲至梁陳淫艷刻飾佻巧小碎之
詞又宋齊之所不取唐興學官大振歷世之文能者互
書而又沈宋之流研練精切穩順聲勢謂之為律詩由
是而後文變之體極焉而又好古者遺近務華者去實
效齊梁則不逮於晉魏工樂府則力屈於五言律切則
骨格不存閑暇則纖穠莫備至於子美所謂上薄風雅
下該沈宋言奪蘇李氣吞曹劉掩顏謝之孤高雜徐庾

之流麗盡得古今之體勢而兼昔人之所獨專矣如使仲尼考鍛其旨要尚不知貴其多乎哉苟以為能所不能無可無不可則詩人以來未有如子美者是時山東人李白亦以奇文取稱時人謂之李杜余觀其壯浪縱恣擺去拘束模寫物象及樂府歌詩誠亦差肩於子美至若鋪陳終始排比聲韻大或千言次猶數百詞氣豪邁而風調清深屬對律切而脫棄凡近則李尚不能歷其藩翰況堂奧乎余嘗欲條析其文體別相附與來者

為之準病懶未就邇適子美之孫嗣業啓子美之柩襄
祔事於偃師途次于荆楚雅知余愛言其大父之為文
祈余為誌辭不可絕余因系其官閥而銘其卒葬云系
曰晉當陽侯杜氏下十世而生依藝生審言善詩官至
膳部員外郎審言生閑閑生甫為奉天令甫字子美天
寶中獻三大禮賦明皇竒之命宰相試文文善授率州
曹屬京師亂步謁行在授左拾遺以直言失官出為華
州司功尋遷京兆功曹劔南節度使嚴武拔為工部員

外叅謀軍事旋又棄其官扁舟下荆楚間竟以寓卒旅
殯嶽陽享年五十九夫人弘農楊氏女父曰司農少卿
怡四十九年終嗣子曰宗武病不克葬沒命其子嗣業
以家貧無以給喪收拾乞丐燠勞晝夜去子美沒後四
十年然後卒先人之志亦足為難矣銘曰惟元和之癸
巳粵某月某日之佳辰合窆我杜子美於首陽之山前
嗚呼千歲而下曰此文先生之古墳

樂天曰杜詩叢多至於貫穿古今覩縷格律盡工盡善

又過於李然撮其新安石濠潼關吏蘆子關花門之章
朱門酒肉臭路有凍死骨之句亦不過三四十杜尚如
此況不逮者乎

睿宗先天元年癸丑是歲甫生明皇開元三年丙辰於
郾城觀公孫大娘舞劍器是年才四歲必有悞天寶元
年癸未有南曹小司寇為山之作時年三十一天寶十
一年癸巳上韋相詩有龍飛四十春帝即位四十年時
有兵車行麗人行十三年乙未上三大禮賦甫年四十

三召試文章授河西尉不
行改右衛率府胄曹十四年丙申是年十一月初

自京赴奉先有懷詠詩是月祿山亂

以家避亂鄜州獨陷城中

天寶

十五載丁酉六月帝西狩有哀王孫詩七月肅宗即位
改元至德是年避寇馮翊有白水高齋三川觀漲詩至
德二年自賊中竄歸鳳翔拜左拾遺八月墨制放往鄜
州迎家有北征詩明年乾元元年收京扈從還長安上
疏論救房瑄帝怒黜甫華州司功有新安吏石壕吏新
婚別垂老別留花門洗兵馬詩明年關輔饑亂棄官之

秦州乃適同谷乃入蜀有遣興三百首上元元年辛丑
在蜀二年嚴武鎮蜀甫自閬往依焉明年寶應元年癸
巳有元年建巳月詩代宗廣德元年甲辰有祭房相國
文武再鎮蜀表甫叅謀檢校工部員外作傷春五首永
泰元年丙午武卒崔旰殺郭英乂楊子琳栢正節舉兵
攻旰蜀亂甫遊東川除京兆功曹不赴大歷元年丁未
移居夔州三年出峽之荆渚至湘潭寓居耒陽五年辛
亥有追高適人日作夏甫還襄漢卒於岳陽

段成式酉陽雜俎云李白集有堯祠贈杜補闕者老杜也詩曰我覺秋興逸誰言秋興悲山將落日去水與晴相宜煙歸北海少鴈度青天遲相失各萬里茫然空爾思不獨飯顙山頭之句也

國朝盛文肅嘗夢朝上帝見殿上題扇云夜闌更秉燭相對如夢寐初謂天上之作已而知子美詩也

彌衡過漁陽慘其聲悲壯漢武時星辰影動搖東方朔謂民勞之應子美詩云五更鼓角聲悲壯三峽星河影

動搖乃用故事也先儒云不行一萬里不讀萬卷書不知老杜詩信然

詩話云有病瘡者子美曰吾詩可以療之病者曰云何
曰夜闌更秉燭相對如夢寐其人誦之瘡猶是也杜曰
更誦吾詩云子章髑髏血模糊手提擲還崔大夫其人
誦之果愈子美傲誕不冠見嚴武故詩云莫倚善題鸚
鵡賦何須不着鷄儀冠子美奉酬云謝安不倦登臨賞
阮籍焉知禮法踈傳敘子美傲放武積不平欲殺之冠

鈎於簾者三遂止

寄韋有夏都中詩云省郎憂病士書信有柴胡飲子頻
通汗懷君想報珠飲子對懷君或云沈佺期齒錄對牙
緋孟浩然雞黍對楊梅之類也

子美題李尊師松障詩云已知仙客意相親更覺良工
心獨苦用意之妙有舉世莫知者此唐人所以名家也

李白

烏棲曲云姑蘇臺上烏棲時吳王宮裏醉西施吳歌楚

舞歡未畢青山猶銜半邊日銀箭金壺

一作金丁

漏水多起

看秋月墜江波東方漸高奈樂何

一作爾何

天寶初賀知章

見之曰此詩可以泣鬼神矣

蜀道難云噫噫吁危乎高哉蜀道之難難於上青天蠶

叢及魚鳧開國何茫然爾來四萬八千歲乃與秦塞通

人煙西當太白有鳥道可以橫絕峨眉巔地崩山摧壯

士死然後天梯石棧方

一作相

鈎連上有六龍回日之高

標

一作橫河斷海之浮雲

下有衝波逆折之回川黃鶴之飛尚不

得過猿猱欲度愁攀緣

一作牽

青泥何盤盤百步九折縈

巖巒捫參歷井仰脅息以手撫膺坐長嘆問君西遊何

時還畏途巉巖不可攀但見悲鳥號古木雄飛雌從遶

林間又聞子規啼夜月愁空山蜀道之難難於上青天

使人聽此凋朱顏連峯去天不盈尺

一作入煙
幾千尺

枯松倒

挂倚絕壁飛湍瀑流爭喧豗水崖轉石萬壑雷其嶮也

若此嗟爾遠道之人胡為乎來哉劒閣崢嶸而崔嵬一

夫當關萬人

一作夫

莫開所守或匪親

一作人

化為狼與豺

朝避猛虎夕避長蛇磨牙吮血殺人如麻錦城雖云樂
不如早還家蜀道之難難於上青天側身西望長咨嗟

一作令
人嗟

蜀道難或曰譏章仇兼瓊或曰譏嚴武之暴為房相
杜甫危之也

宮中行樂詞云小小生金屋盈盈在紫微山花插寶髻
石竹繡羅衣每出深宮裏常隨步輦歸只愁歌舞散化
作綵雲飛

柳色黃金嫩梨花白雪香玉樓巢

一作開

翡翠珠

一作金

殿

鎖鴛鴦選妓隨雕

一作朝

輦徵歌出洞房宮中誰第一飛

燕在昭陽

盧橘為秦樹蒲桃出

一作是

漢宮煙花宜落日絲管醉春

風笛奏龍鳴

一作吟

水簫吟

一作鳴

鳳下空君王多樂事何

必向

一作在

回中

一作還與萬方同

玉樹

一作殿

春歸日

一作好

金宮樂事多後庭朝未入輕輦

夜相過笑步花間語嬌來燭下歌莫教明月去留著醉

姮娥

繡戶香風暖，紗窗曙色新。
宮花爭笑日，池草暗生春。
綠樹聞歌鳥，青樓見舞人。
昭陽桃李月，羅綺自一作坐相親。

今日明光裏，還須結伴遊。
春風開紫殿，天樂下珠樓。
豔舞全知巧，嬌歌半欲羞。
更憐花月夜，宮女笑藏鉤。

寒雪梅中盡，春風柳上歸。
宮鶯嬌欲醉，簷燕語還飛。
遲日明歌席，新花豔舞衣。
晚來移綵仗，行樂好光輝。

水綠南薰殿，花紅北闕樓。
鶯歌聞太液，鳳吹遶瀛州。
素

女鳴珠佩天人弄綵毬今朝風日好宜入未央遊

明皇坐沉香亭意有所感欲得白為樂章召入而白
已醉左右以水潁面稍解授筆成文婉轉精切無留
思

清平調詞云雲想衣裳花想容春風拂檻露華濃若非
羣玉山頭見會向瑤臺月下逢

一枝紅豔露凝香雲雨巫山枉斷腸借問漢宮誰得似
可憐飛燕倚新粧

名花傾國兩相歡
長得君王帶笑看
解釋春風無限恨
沉香亭北倚欄干

禁中木芍藥開上賞之
妃子從帝曰賞名花對妃子
焉用舊樂詞為命李龜年持金花牋賜白為清平樂
詞三章梨園子弟撫絲竹李龜年歌之上親調玉笛
以倚曲每曲遍將換則遲其聲以媚之太真以玻璃
七寶盃酌西涼蒲萄酒笑飲

翰林讀書言懷呈集賢院內諸學士云晨趨紫禁中夕

待金門詔觀書散遺帙探古窮至妙片言苟會心掩卷
忽而笑青蠅易相點白雪難同調本是疎散人屢貽編
促誚雲天屬清朗林壑憶遊眺或時清風來閑倚欄

一作

簷下嘯嚴光桐廬溪謝客臨海嶠功成謝人君

一作間

從

此一投釣

高力士以脫靴之耻譖白於貴妃曰以飛燕指妃子
是賤之甚也不為親近所容乃益放鷺為酒中八仙
人懇求還山

潯陽紫極宮感秋作云何處聞秋聲
脩脩北牕竹迴薄
萬古心攬之不盈掬
靜坐觀衆妙浩然媚幽獨
白雲南山來就我
簷下宿
嬾從唐生決
羞訪季主卜
四十九年非一往
不可復
野情轉蕭散
世道有翻覆
陶令歸去來
田家酒應熟

是時自有歸山之意矣

東武吟云好古笑流俗
素聞賢達風
方希佐明主
長揖辭成功
白日在高天
回光燭微躬
恭承鳳凰詔
歛起雲

蘿中清切紫霄迴優游丹禁通君王賜顏色聲價凌煙
虹乘輿擁翠蓋扈從金城東寶馬麗絕景錦衣入新豐
倚巖望松雪對酒鳴絲桐因學揚子雲獻賦甘泉宮天
書美片善清芬播無窮歸來入咸陽談笑皆王公一朝
去金馬飄落成飛蓬賓友日疎散玉樽日成空才力猶
可倚一作恃不慙世上雄閑作東武吟曲盡情未終書此
謝知己吾尋黃綺翁一作扁舟
尋釣翁
或曰白以是詩留別翰苑遂放遊江湖矣

對酒憶賀監序云太子賓客賀公於長安紫極宮一見
余呼余為謫仙人因解金龜換酒為樂沒後對酒悵然
有懷而作是詩曰四明有狂客風流一作震賀季真長安
一相見呼我謫仙人昔好盃中物翻一作今為松下塵金
龜換酒處却憶淚沾巾

又狂客歸四明山陰道士迎勅賜鏡湖水為君臺沼榮
人亡餘湖宅空有荷花生念此杳如夢淒然傷我情

又曰欲向江東去定將誰舉盃稽山無賀老却棹酒船

迴

飯顙山頭逢杜甫頂戴笠子曰卓午借問因何太瘦生
總為從前作詩苦此詩載於唐舊史

近世傳白詩云斷崖如削爪嵐光破崖綠天河從中來
白雲漲川谷玉案勅文字世眼不可讀攝身凌青霄松
風拂我足又云舉袖露條脫招我飯胡麻

白本末傳記所載不同唐史稱白興聖皇帝九世孫隋
末以罪徙西域神龍初遁還客巴西既長隱岷山蘇頲

為益州長史見白異之更客任城與孔巢父韓準裴政
張叔明陶沔居徂徠山日沈飲號竹溪六逸天寶初南
入會稽與吳筠善筠被召故白亦至長安往見賀知章
賀知章見其文歎曰子謫仙人也

嚴武傳武為劍南節度房琯以故相為部內刺史武慢
倨不為禮最厚杜甫然欲殺甫數矣李白為蜀道難者
乃為房杜危之也

韋皋傳天寶時李白為蜀道難斥嚴武陸暢更為蜀道

易以美韋臯撫言云太白自蜀至京以新業贄謁賀知章知章覽蜀道難一篇揚眉謂之曰公非人世人豈非太白星精耶然則蜀道難之作久矣非為房杜也又南部新書云李白山東人父為任城尉因家焉少與魯人隱徂徠山號竹溪六逸天寶初遊會稽吳筠隱剡中谷稱蜀人非也今任城令廳有白之詞尚存唐范傳正誌其墓曰白涼武昭王九世孫昭王隴西人隋末子孫以罪徙碎葉神龍時白父客自西域逃居綿之巴西而白

生馬唐魏顥李陽冰序其文劉全白撰其墓碣皆曰廣
漢人故論白者或曰隴西或曰山東或曰蜀陽冰云出
翰林浪跡縱酒以自昏穢詠諷之際屢稱山東林白亦
云以張垞讒逐遊海岱間子美所謂汝與山東李白好
蓋白自號也蜀道難或曰作於天寶初或曰作於天寶
末二說皆出於後世以意逆之曰此為房杜危之也陸
暢去白未遠作蜀道易以美韋皋傳之當時而蜀道難
之詞曰錦城雖云樂不如早還家其意必有所屬房杜

之說蓋近之矣

白之父客於巴西故以客呼之

東蜀楊天惠彰明逸事

云元符二年春正月天惠補令於此竊從學士大夫求

問逸事聞唐李太白本邑人微時募縣小吏入令卧内

嘗驅牛徑堂下令妻怒將加詰責太白亟以詩謝云

素西

倚欄釣嬌聲出外頭若非是織女何得問牽牛

令驚異不問稍親招引侍研席

令一日賦山火詩思輒不屬太白從傍綴其下句令詩

云野火燒山去

太白繼云

焰隨紅日去烟逐暮雲飛

令慙止頃之從

令觀漲有女子溺死江上令復苦吟太白輒應聲繼之

令詩云

二八誰家女深來倚岸蘆
鳥窺眉上翠魚弄口傍珠

太白繼云

綠鬟隨波
散紅顏逐

浪無因何逢五伯應是想秋胡令滋不悅太白恐棄去隱居戴天大匡

山往來旁郡依潼江趙徵君蕤蕤亦節士任俠有氣善

為縱橫學著書號長短經太白從學歲餘去遊成都賦

春感詩云

茫茫南與北道直事難諧
玉糝街塵紫遊子面蝶弄美人釵却憶青山

上雲門
掩竹齋

益州刺史蘇頲見而奇之時太白齒方少英氣

溢發諸為詩文甚多微類宮中行樂詞體今邑人所藏

百篇大抵皆格律也雖頗體弱然短羽襍裊已有雛鳳

態淳化中縣令楊遂為之引謂為少作是也遂江南人

自名能詩累謫為令云始太白與杜甫相遇梁宋間結

交歡甚久乃去客居魯徂徠山甫從嚴武成都太白益

流落不能歸故甫詩又云

匡山讀書處
頭白好歸來

然學者多疑太

白為山東人又以匡山為匡廬皆非也今大匡山猶有

讀書臺而清廬鄉故居遺地尚在廢為寺名龐西院有

唐梓州刺史碑

失其名

及綿州刺史高杞記太白有子曰

伯禽女平陽皆生太白去蜀後有妹月圓前嫁邑子留

不去以故葬邑下墓今在隴西院旁百步外或傳院乃其所捨云又白詩云昔作芙蓉花今為斷腸草以色事他人能得幾時好陶洪景仙方云斷腸草不可食其名美好名芙蓉乃知詩人無一字閒語



唐詩紀事卷十八

欽定四庫全書

集部

唐詩紀事卷

十九至
二十一

詳校官監察御史臣沈孫璉

主事銜臣徐以坤覆勘

覆校官中書臣呂雲棟

校對官原任典簿臣郭祚熾

謄錄監生臣陳際龍

謄錄監生臣楊其梓

欽定四庫全書

唐詩紀事卷十九

宋 計敏夫 撰

崔宗之

敬括

房琯

蘇源明

崔宗之

宗之襲父日用齊國公封好學寬博有風舉與李杜以

文相知贈李白云涼秋八九月白露空園庭耿耿意不

暢捎捎

一作悄悄

風葉聲思見雄俊士共話今古情李侯忽

來儀把袂苦不早清論既抵掌玄談多絕倒分明楚漢

事歷歷王霸道擔囊無俗物訪古千里餘袖有匕首劍
懷中茂陵書雙眸光照人詞賦凌子虛酌酒竝素琴霜
風氣凝潔平生心中事今日為君說我家有別業寄在
嵩之陽明月出高岑清溪澄素光雲散牕戶靜風吹松
桂香子若同斯遊千載不相忘白和云朔風橫高天萬
里起秋色壯士心飛揚落日空嘆息長嘯出原野凜然
寒風生幸遭聖明時功業猶未成奈何懷良圖鬱悒獨
愁坐

一作空
獨坐

杖策尋英豪立談乃知我崔公生人秀緬

邈青雲姿制作參造化託諷含神祇海岳尚可傾吐諾
終不移是時霜飈寒逸興臨華池起舞拂長劒四座皆
揚眉因得窮歡情贈我以新詩又結汗漫期九垓遠相
待舉身慙蓬壺濯足弄滄海從此凌倒景一去無時還
朝遊明光宮日暮闔闔關但得長把袂何必嵩邛山
宗之為侍御史謫官金陵與白詩酒唱和月夜乘舟自
採石達金陵

敬括

孫晦昕眸

括字叔弓河中人為殿中侍御史不諧附楊國忠出知
果州入為兵侍志簡淡不求名後刺同州隱然持重大
歷中卒

括試七月流火云前途一葉下言念忽悲秋變節金初
至分寒火正流氣含良夜早光拂夏雲收助月微明散
沿河麗景浮秋標時令美詩興國風幽自此觀邪正深
知玉葉休

房琯

琯宰盧氏王維贈詩云達人無不可忘己愛蒼生不復
小千室絃歌在兩楹又云視事兼偃卧對書不簪纓蕭
條人吏踈烏雀下空庭是時琯之清名已重於搢紳矣
琯題漢州西湖云高流纏峻隅城下緬邛墟決渠信浩
蕩潭島成江湖結宇依回渚水中信可居三伏氣不蒸
四達暑自徂同人千里駕鄰國五馬車月出共登舟風
生隨所如舉麾指極浦欲極更盤紆繚繞各殊致夜盡
情有餘遭亂意不開即理還暫祛安得長晤語使我憂

更除琯字次律融之子也相肅宗有遠器好談老子浮屠法高談有餘而不切事

蘇源明

天寶十二載源明守東平宴濮陽守崔季重魯郡李蘭濟南田琦濟陽李陵于回源亭為小洞庭五太守讌集載其歌曰小洞庭兮牽方舟風嫋嫋兮離平流牽方舟兮小洞庭雲微微兮連絕崕層瀾壯兮緬以沒重崑轉兮超以忽馮夷逝兮護輕撓蛟龍行兮落增潮泊中潮

兮澹而閑並曲淑兮悵而還適予手兮非予期將解袂
兮襲予思尚君子兮壽厥身承明主兮憂斯人

其後以國子司業召須尉袁廣饒于小洞庭復歌曰浮
漲湖兮莽迢遙川后禮兮扈予橈橫增沃兮蓬僊延川
后福兮易予眩月澄凝兮明空波星磊落兮耿秋河夜
既良兮酒且多樂方作兮奈別何

子美八哀詩曰武功少也孤徒步客徐克讀書東嶽中
千載考墳典時下萊蕪郭忍飢浮雲嘯負米晚為身每

食臉必泣夜字照薪垢衣生碧蘚庶以勤苦志報茲
劬勞願學蔚醇儒姿文包舊史善灑落辭幽人歸來潛
京輦射策君東堂宗匠集精選制可題未乾乙科已大

闡文章日自負吏祿亦累踐晨趨閭闔內足踏宿昔趼

一麾出守還

源明累遷太子諭德為東平太守故召為國子司業也

黃屋朔風卷

不暇陪八駿虜庭悲所遣平生滿樽酒斷此朋知展憂

憤病二秋有恨石可轉

安祿山陷京師源明以病不受偽官黃屋車蓋也

肅宗

復社稷得無逆順辨

肅宗復兩京權考功郎中知制誥

范曄顧其兒李

斯憶黃犬秘書茂松意再扈祠壇壇前後百卷文枕藉
皆禁齋篆刻楊雄流溟漲本末淺青瑩芙蓉劒犀兕豈
獨剽反為後輩褻予實苦懷緬煌煌齋房芝事絕萬手
蹇垂之俟來者正始真勸勉不要懸黃金胡為投亂贗
結交三十載吾與誰遊衍滎陽復冥莫罪罟已橫罨嗚
呼子逝日始泰則終蹇長安米萬錢凋喪盡餘喘戰伐
何當解歸帆阻清沔尚纏漳水疾永負蒿里餞

詩中滎陽謂鄭

虔也

唐詩紀事卷十九